

10 MAY 1999

Lajim-Mahathir

SABAH RANCANG SAMBUTAN MERIAH UNTUK DR MAHATHIR

KOTA KINABALU, 10 Mei (Bernama) -- Sambutan meriah telah dirancang untuk Perdana Menteri Datuk Seri Dr Mahathir Mohamad yang akan tiba di Sabah, Khamis ini untuk lawatan kerja dua hari.

Timbalan Ketua Menteri Datuk Lajim Ukin berkata, antaranya perarakan 70 penunggang kuda Bajau yang akan mengiringi kenderaan Perdana Menteri dan rombongan sebaik tiba pada pukul 2 petang di Terminal Lama Lapangan Terbang Kota Kinabalu, petang Khamis ini.

Aturcara pertama ialah perjumpaan tertutup dengan anggota-anggota Kabinet negeri dan pembantu-pembantu menteri pada kira-kira pukul 4 petang.

"Ia kemudian diikuti dengan majlis tahlil di Masjid Negeri sempena majlis kesyukuran kemenangan Barisan Nasional (BN) pada pilihan raya negeri Mac lepas," katanya pada persidangan berita di sini.

Lajim yang juga pengerusi jawatankuasa induk sambutan kedatangan Perdana Menteri berkata, pada sebelah malamnya Dr Mahathir dijadual menghadiri majlis kesyukuran di Stadium Likas di sini.

Pada Jumaat, Perdana Menteri akan bertemu rakyat di Ranau, kira-kira 100km dari sini.

Beliau kemudian akan menunaikan solat Jumaat di Masjid Negeri sebelum menghadiri jamuan tengah hari bersama Menteri-menteri Kabinet negeri diketuai oleh Ketua Menteri Datuk Osu Sukam.

Satu persidangan berita dijangka diadakan pada pukul 2.30 petang sebelum beliau pulang ke Kuala Lumpur.

-- BERNAMA

JS PR